



**Geschichte der geistlichen Stiftungen, der adlichen
Familien, so wie der Städte und Burgen der Mark
Brandenburg**

[Urkunden-Sammlung für die Orts- und spezielle Landesgeschichte]

Riedel, Adolph Friedrich

Berlin, 1859

CLXV. Gevettern von Köckte verkaufen dem Johannisstifte auf der Burg zu
Tangermünde eine Wiese wiederkäuflich, am 13. Dezember 1511.

Nutzungsbedingungen

[urn:nbn:de:hbz:466:1-54934](https://nbn-resolving.org/urn:nbn:de:hbz:466:1-54934)

CLXV. Gewetteren von Rödte verkaufen dem Johannisstifte auf der Burg zu Tangermünde eine Wiese wiederkäuflich, am 13. Dezember 1511.

Wy Hinrick, Jhan vnd Henninck, Geuedderen, die van Kockten genanth, bekenen vor vns vnd vnse rechte eruen, dath wy den werdigen vnd ernhaltigen Herren Praweste, Senior vnd Capittel der Kerken sancti Johannis Baptisten vnd Johannis Apostels vnd Ewangelisten vpp der Borgh to Tangermunde, midt willen vnd Fulborth der Irluchtigesten Hochgeborn Fursten vnde Herren Ern Joachim, des hilgen Romischen rikes Ertzkemerer vnde Kurfurste, vnd Albrechte, gebrudere, Marggrafen to Brandenburg, to Stettin, Pameren, Cassuben vnd Wenden Hertogen, Burggrafen to Nuremberge vnde Fursten to Rugen, vnseren gnedigesten vnd gnedigen Herren, vorkofft hebben vnde vorkopen, in craft dusses breues, eine wische, genometh die nie wische, upp der seltmarcke to Kockte, Welcker wische die Bure van Darnstede etlike Jar gewonnen hebben, mith aller gerechticheit, grunde vnd nutticheit, nictes buten bescheiden. Doch hebbe wy vns in dissem kope beholden, dath wy desulue wische alle jar suluest vthdhun vnd dem gemelten Capittelle edder orem kelner viff marck Stendalischer were ierliker rente to Tangermunde in einer summen geuen vnd betalen schalen vpp den dagh Simonis vnd Jude, der hilgen apostele. Wes wy die dhurer vthdhun können, schal vns to gude vnd framen komen. Effe dar ock vorhindernisse anqueme, nomelick waters edder miswasses haluen, also dat wy die wische nicht so hoch kunden vthdhun, schal dem gnanten Capittelle vnshedelich syn an oren vorbenomeden tinsen vnd renten. Also denne willen wy dem Capittelle edder orem Kelner fulke viff marck tines van andern vnseren redeten gudern an jennigerlei insage geuen vnd betalen. Vnde setten sy in die gerulike hebbende gewere disser tins in craft dusses Breues. Dar vor hebben vns de gnanten Heren Prawest vnd Capittelle in einer Summen to guder genuge betalet vnd gegeben hundert vnd sels marck Stendelischer gewere houetsumme, die wy forder in vnse vnd vnser rechten eruen nuth vnd framen gewanth hebben. Wy hebben vns ock in dusssem kope vor vnns vnd vnse rechte eruen beholden, wannehr wy dusse wische wedder to vns kowpen willen, dath schale wy dem gnanten Praweste vnd Capittelle in Sunte Michaelis dage vorkundigen vnde darnegesth vpp sunte Lucien dagh der hilgen Juncfrouwen one hundert vnd sels marck vorgeuomet Houetsumme in orem Capittelhuse to Tangermunde midt den bedageden vnd hinderstelligen tinsen in einer summen wol to danke widdergeuen vnd betalen. Vnde wannehr dath also sso geschein ifs, Also denne schalen de wische vnd rente wedder vns vry vnd loff vnd disse Breff machlofs sin. Ock laue wy vorbenomeden alle van Kockte vor vns vnd vnse rechte eruen, alle dusse vorgescruen puncte vnd artikele an ienigerleie behulpp vnd argelifth stede feste toholdende. Dels to orkunde hebbe wy vppgenante Hinrich, Jhan vnd Henninck van Kockte ein iderman an dussen breff sin Ingefegell vor vns vnd vnse rechten eruen wiliken laten hengen, Die gegeben vnd gescreuen ifs to Tangermunde, nha Christi geborth dusent viffhundert in dem elfften iar, am dage Lucie der hilgen Juncfrouwen.